



Tuhaqtauyukhaq



Qillaminuaq Tuhaqtitauyukhaq

Nunavut Kavaman Nunavut Tun'ngavikkutlu Havaqatigiikhimaalikuq hivumuuqniirmut talvuuna Ilingaiyaingnikkut

IQALUIT, Nunavut (Tattiaqnaqtuq 24mi, 2012mi) – Hivulliqtiuyuq Eva Aariak Nunavut Tun'ngavikkutlu Angiyuqaakyuanga Cathy Towtongie ublumik atiqtuivaktun Titiragiikhimayuq Ilihimayukhanik talvani Nunavut Katimaqyuarutmi talvuuna Ilingaiyaingnikkut taima tuhaqtihimayut pivalliatjutikhaq tapfuminga *Nunavut Niqautingnik Munagitjutikhangit Hanaqitjutikhanikkut*.

Tamna Titiragiikhimayuq Ilihimayukhaq angirutigiyauyuq talvuuna havaqatigiikniaqtun kavamavut NTI-kutlu aulatitiyaangat *Tamna Makimaniq Pangnairutikhaq: Taima Ilaqatigiiknir Upatutikhaq talvuuna Ilingaiyaingnikkut*. Tamna aulatititjutikhaq tapfuminga Nunavut Niqautingnik Munagitjutikhangit Hanaqitjutikhaq Katimayingit taimalu pangnairutikhaq talvuuna nunaquuaptingni hanaqitjutihaqyuaq talvuuna niqautinik munagitjutikhakkut hivunigiluaqniaqtaat talvani *Tamna Makimaniq Pangnairutikhaqni*.

“Una Titiragiikhimayuq Ilihimayukhaq ikayuutikhaq Nunavut Kavamangit akhuqhimaahutik havaqatigiiknikkut ilagiiqatiginiyaangat ikikliyumiqtitiyaangat ilingaiyaingnikkut, angikliyumiqtitilugulu kiutjutikhangit, ihivriuqtiaqlugit naunaiyagiikhimayut, taimalu aulahimaaqhimayukhaq hivunikharnut kavamangit,” uqallaktuq Hivulliqti Eva Aariak. “Taima ilanga una havagumayaingit, havakhimaaqniaqtugut niqautinik munagitjutikhakkut hanaqitjutikhaq taima nalvaaqhiyaangat ihuaqhaitjutikhaqnik talvuuna amigiyaaulaqtukhanik inuuhirinnikkut hanaqitjutikhangit.”

“Nunavut Tun'ngavikkut quviahuktun aulatitiyaangat ilagiiqhaqnik Nunavut Kavamangit talvuuna ilingaiyaingnikkut ikiklilaarutikhaqnik Nunavunmi. Quviagiyaavaktavaut nunalaani ilaunginaqtunik, taima iniqtigivakamik katimayukhanik tapfuminga *Tamna Makimaniq Pangnairutikhaqnik*, taima nigiuhimaqniaqtugut havaqatigiyaangat ilagiiqpun aulatitiyaangat Nunavunmi hanattiaqhimayuq ihuaqhaitjutikhaqnik. Nunavut Tun'ngavikkut itqumayumik ihumayut taimalu ihuaqtumik aulahimaaqtukhauyut ihuaqhaitjutikhat taima namaktumik ikayugiangat ayuknautikhaqnik Inungnut. Hanaqitjutikhat aulahimaaqtukhat hadja talvuuna niqautikhaqnik munagitjutikhainik,” uqallaktuq Angiyuqaakyuaq Towtongie.

Tamna Titiragiikhimayuq Ilihimayukhanik naunairutiqaqtuq taima Nunavut Katimaqyuarutmi talvuuna Ilingaiyaingnikkut piqaqniaqtuq malrunqnik ihumagiyaayukhaqnik hanaqitjutikhaqnik:

havakhimaaqlutik atuqtauyukhat talvani Naunaitkutim Iluaniitun 32mi talvanga Nunavut Angirutainituni taima pittiaqnikkut ilingaiyaingnikkut ikiklilaaqnikkut, taimalu aulahimaaqlutik havaqatigiiklutik aulatitihimaagiangat *Tamna Makimaniq Pangnairutikhaqni: Ilaqatigiiknir Havaaqhaq talvuuna Ilingaiyaingnikkut Ikikliyumirutikhaq.*

Pivalliatjutikhaq talvuuna Nunavut Niqautinik Munagitjutikhaq Hanaqitjutikhaq aulavaktuq uvani ukiahaliktiluni taima kaffiunik katimatjutikhaqnik ilautivakhugitlu Nunavut Niqautinik Munagitjutikhangit Katimaqyuarutikhaanik aulaniaqtuq talvuuna Upluqtuhinirvia 2013mi talvani lqalungni. Katimaqyuarutikhat ilauniaqtun havaqatigikniaqtun pangnairutikharnik talvuuna niqautinik munagitjutikhaqnik Nunavunmiunut, taima tuhaqtitauniaqtuq talvuuna upin'ngakhaqmi 2013mi.

Tamna hitmanik tatqikhiutinik hanaqitjutikhaq aulatjutikha qaritinaqtuq ilaayukhanik talvunga Nunavut Niqautikhanik Munagitjutikhat Katimayiihaqnik ilaayukhaniklu tamainin havakvingnin ihumaliukhimayut talvuuna aulatjutingnikkut, tuniqhainikkut nigiyaunginaqtunlu niqqiit nunaqyuaptingni, ilauqaqniaqtun anguyuktunik, nautiinginaqtunik, niuvrutiinaqtunik, Inuit Katitjutiqatigiini, kavamanmi havakviini, nunalaani, nanminiqaqtuniklu havagviit.

Tamna Nunavut Niqautikhanik Munagitjutikhat Katimayii iniqtigivaktun ilaayukhanik saivanik Nunavut Kavamanmi havakviinin, Nunavut Tun'ngavikkutlu taimalu pingahuuyunik Aviktuqhimayuni Inuit Katitjutiinin. Tamna katimayiiuaq ihivautalik talvanga Nunavut Kavamanin Havakviinin munarhiliqiyikkut Inuuhiriknirmullu Nunavut Tun'ngavikkungitlu Inuuhiriliqiyut Pitquhiliqiyunutlu Pivalliatjutiliqiyitkuni.

Tamna Nunavut Katimaqyuarutmi talvuuna Ilingaiyaingnikkut aulatitihimavaktuq tapkuninga Nunavut Kavamangit Nuanvut Tun'ngavikkutlu; kihiani, ilaayukhat angmaumayut kituminliqaak havakvingni taima aituimayut talvuuna ikiklilaaqnirmut ilingaiyaingnikkut Nunavunmi taima naunaiyagiikhimayut talvani *Tamna Makimaniq Pangnairutikhaqni.*

###

Naunaiqyumigumaguvit hivayaqlugit:

Emily Woods
Tuhaqtitiunik Titiraqta
Afisiani Hivulliqtim
Nunavut Kavamanga
Hivayauta: 867-975-5059
Qaritauyakkut: ewoods@gov.nu.ca

Kerry McCluskey
Aulapkaiyi Tuhaqtitiliqiyunik
Havakviani Havaktuliliqiyunik
Nunavut Tun'ngavikkut
Hivayauta: 867-975-4914
Nanminiitug hivayauta : 867-222-2893
Akiitug Hivayaut: 1-888-646-0006
Qaritauyakkut: KMcCluskey@tunngavik.com